



Inatsisartunut ilaasortaq,  
Aqqa Samuelson, IA  
Maani/

### § 37 naapertorlugu apeqquteqaammut nr. 76-2019-imut akissut

Ulloq: 30-01-2019  
Suliap normua: 2019 - 2875  
All. nr.: 9936675

Inatsisartut Suleriaasianni § 37, imm. 1 naapertorlugu *aallarteqqinnissamut tapiis-suteqartarneq* pillugu Naalakkersuisunut apeqquteqarputit. Apeqqutit suliassaqarfigisannit akineqartussanngorlugit innersuunneqarput.

Postboks 269  
3900 Nuuk  
Oqarasuaat (+299) 34 50 00  
Naqitanik nassitsigasuaat  
+299 34 63 55  
E-mail: apn@nanoq.gl  
www.naalakkersuisut.gl

1. **Ukiut kingullit 5-it ingerlaneranni inatsit Inuussutissarsiutigalugu aalisartut, inuussutissarsiutigalugu piniartut inuussutissarsiutigalugulu nunalerinermik ingerlataqartut aallarteqqinnissamut tapiiffiqineqartarnerat pillugu inatsisartut inatsisaat nr. 3, 21.maj 2004-meersoq §1, Imm. 2 aallaavigalugu qinnuteqaatinik qassinik Naalakkersuisut tigusaqarnikuuppat?**

AKISSUT:

Naalakkersuisut ukiuni kingullerni tallimani aallarteqqinnissamut tapiiffiqineqarnissaq pillugu inatsisartut inatsisaanni nr. 3, 21. maj 2004-meersumi § 1, imm. 2 malillugu aallarteqqinnissamut tapiiffiqineqarnissamut qinnuteqaatinik 27-nik tigusaqarsimapput.

2. **Inatsit qulaani pineqartoq aallaavigalugu §1 tunngavigalugu qinnuteqaatit ukiuni tallimani qassit:**
  - a. Akuerineqarsimappat?
  - b. Itigartinneqarsimappat?

AKISSUT:

- a. Ukiuni kingullerni tallimani inatsimmi siuliani eqqaaneqartumi § 1 malillugu qinnuteqartut 303-t akuerineqarsimapput.
- b. Ukiuni kingullerni tallimani inatsimmi siuliani eqqaaneqartumi § 1 malillugu qinnuteqartut 115-it itigartinneqarsimapput.

Taakku saniatigut qinnuteqartut 61-it aallarteqqinnissamut tapiiffiqinissaannik neriorsorsimasatta tapiissutivut atorniarnelugit nalunaarfigisimangilaatigut. Akisoqarsimannginnera peqqutigalugu taamaammat taakku naammassillugit suliarineqarsimangillat, suliareqqitassaannngitsutullu naatsorsuullugit.

3. **Inatsit qulaani pineqartoq aallaavigalugu §1, imm. 2 tunngavigalugu qinnuteqaatit ukiuni tallimani kingullerni qassit:**
  - a. Akuerineqarsimappat?
  - b. Itigartinneqarsimappat?

AKISSUT:

- a. Ukiuni kingullerni tallimani §1, imm. 2 malillugu qinnuteqartut 27-t akuerineqarsimapput.
- b. Ukiuni kingullerni tallimani §1, imm. 2 malillugu qinnuteqartunik itigartitsisoqarsimangilaq.

**4. Inatsit qulaani pineqartoq aallaavigalugu qinnuteqarnissami §1 tunngavigalugu qinnuteqassagaanni piumasaqaatit suut eqquutsinneqaqqaarsimassappat?**

AKISSUT:

Aallarteqqinnissamut tapiiffigineqartarneq pillugu inatsisartut inatsisaanni uku atuupput:

- Qinnuteqartoq inuussutissarsiutigalugu aalisartuussaaq, inuussutissarsiutigalugu piniartuussaaq imaluunniit inuussutissarsiutigalugu nunalerinermik ingerlataqartuussalluni.
- Qinnuteqartoq pigisat ajoquserneratigut, inuussutissarsiornermi sakkugisat tammarnersigut imaluunniit napparsimanikkut imaluunniit allatut timikkut ajoquserluni sulisinnaajunnaarnikkut inuussutissarsiutiminut tunngatillugu annaasaqarsimassaaq.
- Ajoquserneq, annaasaqarneq, napparsimaneq imaluunniit sulisinnaajunnaarneq nammineerluni sillimassutitigut pisortalluunniit sillimasiinersigut imaluunniit namminersortut pisortalluunniit tapiissutigisartagaasigut assigisaasigulluunniit matussuserneqarsimassanngilaq imaluunniit matussuserneqarsinnaassanngilaq.
- Qinnuteqartoq qinnuteqarnermut immersugassamik immersueriarluni nassiussissaaq
- Qinnuteqartoq aningaasatigut inissisimaneranut uppersaatinik kiisalu inuussutissarsiornermut atasumik pigisat ajoqusernerannut, annaasaqarnermut, napparsimanermut allatulluunniit timikkut ajoqusernikkut sulisinnaajunnaarnermut uppersaatinik ilanngussissaaq.

**5. Inatsit qulaani pineqartoq aallaavigalugu qinnuteqarnissami §1, imm. 2 tunngavigalugu qinnuteqassagaanni piumasaqaatit suut eqquutsinneqaqqaarsimassappat?**

AKISSUT:

- Qinnuteqartoq inuussutissarsiutigalugu aalisartuussaaq, inuussutissarsiutigalugu piniartuussaaq imaluunniit inuussutissarsiutigalugu nunalerinermik ingerlataqartuussalluni.
- Qinnuteqartoq qinnuteqarnermut immersugassamik immersueriarluni nassiussissaaq.
- Qinnuteqartup aningaasatigut inissisimaneranut kiisalu qinnuteqaammut tunngavilliisunik pissutsinik immikkut ittunik nassuiaanermik imaqartunik qinnuteqartoq ilanngussissaaq.

**a. §1, imm. 2 oqaaseq atorpeqartoq "pissutsini immikkut ittuni" qanoq Naalakkersuisut nassuiaassutissaqartippaat?**

AKISSUT:

- a. "Pissutsini immikkut ittuni" tassaavoq nalinginnaasuunngitsumik pisoqartoq.

Inussiarnersumik inuulluaqqusillunga



Nikkulaat Jeremiassen

Aalisarnermut, Piniarnermut Nunalerinermullu Naalakkersuisoq



29. januar 2019.

Inatsisartut Suleriaasianni § 37 imm. 1 naapertorlugu Naalakkersuisunut apeqquut imaattoq matumuuna saqqummiuppara.

### **Naalakkersuisunut apeqquut:**

- 1. Ukiut kingulliit 5-it ingerlaneranni inatsit Inuussutissarsiutigalugu aalisartut, inuussutissarsiutigalugu piniartut inuussutissarsiutigalugulu nunalerinermik ingerlataqartut aallarteqqinnissamut tapiiffigineqartarnerat pillugu inatsisartut inatsisaat nr. 3, 21.maj 2004-meersoq §1, Imm. 2 aallaavigalugu qinnuteqaatinik qassinik Naalakkersuisut tigusaqarnikuuppat?**
- 2. Inatsit qulaani pineqartoq aallaavigalugu §1 tunngavigalugu qinnuteqaatit ukiuni tallimani qassit:**
  - a. Akuerineqarsimappat?**
  - b. Itigartinneqarsimappat?**
- 3. Inatsit qulaani pineqartoq aallaavigalugu §1, imm.2 tunngavigalugu qinnuteqaatit ukiuni tallimani kingullerni qassit:**
  - a. Akuerineqarsimappat?**
  - b. Itigartinneqarsimappat?**
- 4. Inatsit qulaani pineqartoq aallaavigalugu qinnuteqarnissami §1 tunngavigalugu qinnuteqassagaanni piumasaqaatit suut eqquutsinneqaqqaarsimassappat?**
- 5. Inatsit qulaani pineqartoq aallaavigalugu qinnuteqarnissami §1, imm.2 tunngavigalugu qinnuteqassagaanni piumasaqaatit suut eqquutsinneqaqqaarsimassappat?**
  - a. §1, imm.2 oqaaseq atorneqwartoq" pissutsini immikkut ittuni" qanoq Naalakkersuisunit nassuiaassutissaqartippaat?**

(Inatsisartunut ilaasortaq Aqqa Samuelson, Inuit Ataqatigiit)

### **Tunngavilersuut:**

Apeqquuteqaatini inatsit aallaaviusoq:

*Inuussutissarsiutigalugu aalisartut, inuussutissarsiutigalugu piniartut inuussutissarsiutigalugulu nunalerinermik ingerlataqartut aallarteqqinnissamut tapiiffigineqartarnerat pillugu inatsisartut inatsisaat nr. 3, 21.maj 2004-meersoq.*

Inuussutissarsiutigalugu aalisartut, inuussutissarsiutigalugu piniartut taavalu nunalerinermik ingerlataqartut inuussutissarsiummik ukiuni kingullerni tallimani aallarteqqinnissamut tapiiffigineqartarnerannut paasissutissat ersarissut paasisaqarfigissallugit pingaaruteqarpoq.

Aallarteqqinnissamut tapiiffigineqarnissamut qinnuteqarsimasut amerlassusaat, taakkunanngalu qanoq amerlatigisut akuerisaasimanersut akuerisaasimannnginnersut ilanngullugit paasisaqarfigerusuppakka, taavalu inuussutissarsiornerup aallarteqqinnissaanut tapiiffigineqarnissamut piumasaqaatit suuneri annertunerusumik paasisaqarfigerusullugit.

Kissaatigivara apeqqutikka ullut suliffiusut qulit qaangiutinnginneranni akineqarnissaat.